

紀文達公遺集

紀文達公遺集卷第五

孫樹馨編校

摺子

恭謝

六巡江浙蠲免直隸山東經過地方額賦併豁順天十

二府州屬舊借倉穀摺子

乾隆四十九年

欽惟我

皇上健協天行仁均春澤

六飛時邁勤民屢省乎堯封四嶽

親臨

啓蹕必經乎禹甸推恩自近向陽之小草偏榮錫福居
先煦物之和風早被茲當蒼龍之應節珠斗東回恭逢
翠鳳之揚旂

金輿南指吳山越水凡六度之

巡方趙際燕陲總三分之減賦九程驛路未聞供頓之
勞五色

天書乃布蠲除之惠行歌驅犢寬租之

詔相傳額手扶鳩望

幸之心已慰何期

溫綽宣自途中更荷

鴻鈞施諸格外往以瞻蒲望杏賞二月之催耕恒於鋤
雨犁雲

厯三農之播穀十行

御札每降種之自

天雙穎嘉禾冀力田之有歲此雖如期以納已莫報夫
生成況乎積數彌多實倍增其愧悚乃蒙

眷顧施仁於補助之餘盡免征輸拜

賜於豫遊之始五百里近光郊遂共沐

恩波十萬餘藏富閭閻益培元氣鉅鹿東連乎瀛海謳
吟滿赤縣之封盧龍南抵乎長河抃舞接青齊之境

等居叨戴斗生幸逢辰來自田間依於日下

德音初布已同耕穫之餘三愷澤連敷更貲倉儲之累
萬十二屬表延河北熙春者均似桐生四千里翹望江
南就日者真如葵向敬附章於驛騎先達丹忱待泥首
於

皇衢恭迎

黃屋表增軒紀惟期

曼壽之延年福衍箕疇長祝

昌辰之保極

恭謝

六巡江浙喜得 元孫直隸山東老民老婦一體賞賚

復因二省缺雨軍流以下遞予減等摺子

乾隆四十九年

欽惟我

皇上化洽堯衢壽縣軒紀得天久照

七旬並曜於儀璘與物皆春六度

時巡乎吳越鯨波蛟室經

指畫而皆寧蠻舍漁莊飲和甘而已徧詩歌嘉樂信保

佑之自

天卜協康彊遂子孫之逢吉慶流五葉多男真驗於華

封澤沛三霄禮艾旁稽乎周典星文朗耀寧惟瑞應南

第 三 十 五 卷
三
孤州絡毗連併使

恩霑北海

絲綸一布歡聲增擊壤之吟穀帛分擎喜氣溢

何鑒之路至於

勤求民瘼俯念菑畬感召天和仰求膏澤燕齊接壤凡
經

翠鳳之循行究冀分疆總荷金雞之赦宥圍屏晝靜至
三細而咸矜貫索宵占從五流而遞減途中

申命推恩者益以加恩格外施仁斂福者因而錫福聯
駢

溫綽齊歌瓜瓞之徵祥幹運

洪鈞峙見黍苗之被潤歡心均洽協氣旁流

臣

等幸列

鸛班恭聞

鳳詔久喜郊圻之近日

愷澤先霑何期

鑾輅之觀風

鴻慈亦被南薰溥鬯得邀一視同仁北斗長依惟祝

萬年有慶百男蕃衍驗周京養老之符四海昇平徵虞

代好生之福

恭謝

恩綏保定河間府屬十四州縣積欠摺子

乾隆五十四年

欽惟我

皇上醴化涵濡鴻慈茂育裨瀛環絡久

仁浹於黃圖畿甸提封尤

恩加於赤縣自

天敷澤先霑太極之泉向日熙陽均作恒春之草耕田

鑿井堯衢競奏其風謠賜復除租禹甸時蠲其銍秸當

昨歲夏耘之始甘澍微遲於平時秋省之前

宸心已屢黃雲未刈眷懷租吏之追呼

丹綽先傳

時詔農曹之倚閣固已秋場賽社得共慶夫豐穰相期
春稅輸官務早償夫夙負况乎酉爲太歲正乞漿得酒
之年兼以午屆天中又打麥登場之候餘糧棲畝欣元
氣之全蘇多稼如雲宜積逋之畢納乃蒙

雨露申

恩命而加恩再沛

絲綸因緩徵而又緩本屬賦中之正額久愧稽延偏邀
格外之殊施深爲軫念

德音下逮一時共拜夫生成喜氣交融兩郡均霑夫樂
利近依三輔保陽列右輔之區旁帶九河瀛海接長河

之界五百里郊圻之內驅犢行歌十四邑間井之中荷鋤抹舞南薰長養當五絃解慍之餘西陸收成竚十月
滌場之後歡生襍稊慶洽衡茅臣等隸籍神臯近光
帝里先疇久服大都來自田間

聖渥頻霑洵得登諸朝籍

丹墀陪列叨備駕行

黃閣宣綸先聞

鳳詔登民衽席幸桑梓之逢春藏富閭閻喜畢箕之從
好擊轅中律遙聽青塍綠野之歌鞠脰陳詞代寫白叟
黃童之悃

恭謝

八旬萬壽升秩岱宗展儀闕里直隸廣學額免積欠加

賑一月摺子

乾隆五十五年

欽惟我

皇上道協生成澤醲教養播詩書於學校

化先首善之區

省耕斂於春秋

恩始近光之地身依

日月久瞻

堯帝之文章路接郊圻恒頌

奴王之游豫欣值

八旬開表六星瑞應於南詒恭逢

萬乘鳴鑾二月

時巡於東岳淵源道脈

尼山將薦於馨香

培植儒風冀野先霑夫

雨露

詔宣丹綽旁搜滄海之珠春暎青袍添采泮池之藻鬣

宮路闢祥徵

壽考之作人弟子員增吉叶彙征之交泰黨庠術序橫

經者並祝三多夏誦春絃鼓篋者齊呼

萬歲固已敦崇四術同沾

教化於薪樵何期

眷顧三農更

念艱難於稼穡

堯咨深切雨暘悉繫乎

皇情禹甸

經行銍耜皆關於

睿慮維歲星之氣化時有饑穰致井稅之輸將每從倚
閣寬征已屢自四十八載以來積欠遂多計一百萬餘

以外

恩宜仰報方共切夫慚惶分屬應供敢久稽乎逋負乃
絲綸之下逮

軫卹民依竟金粟之全蠲均叨

宸厯盈寧永慶真同幃載之元功樂利無疆非比驩虞
之小補况乎

六飛清蹕

巡省閭閻四郡通津往來川陸九河故道南袤蓼縣之
南諸淀澄流北界雄州之北五百里近郊之內偶奏艱
鮮十一邑積水之餘夙蒙賑貸修防完固久經波靜魚

龍撫字周詳早已澤無鴻雁

皇慈俯念偏深二鬴之虞

聖渥重加更

賜三旬之餼

仁天化育真感沁於心脾

壽宇恬熙但情深於葵藿風謠相答歡忭難名

臣等來

自茆檐居依

楓陛一經舊法曾隸籍於儒官萬井提封久題名於戶
版幸得青雲之路身列鵷鸞環瞻赤縣之封人皆桑梓

自

天布澤聞

巽命之重申與物皆春荷

德音之三錫

龍光優渥欣偕鄉黨以承

恩鳧躍連翩願共士民而獻

壽薇垣北拱敬同拜表於星郵

芝蓋東臨遙祝添籌於海屋

恭謝

巡幸天津分別蠲免經過地方併所屬州縣積欠摺子

乾隆五十九年

欽惟我

皇上仁溥堯天澤先禹甸省耕省斂時關望歲之心一
豫一遊恒布寬征之命五十九年之內加惠者筆不勝
書百卅三邑之中食福者頌難縷述固已衢尊徧沃久
壽寓之同登今茲

日御時巡復

恩綸之疊沛粵當春月

俯念三農遂涉川途

親臨二淀候瞻蒲葉用觀冀北之田功波漲桃花兼閱
燕南之水利青旗拂柳將詰旦以鳴鑾

黃閣宣麻早先期而奉

詔

翠華西指初程起析木之津

鳳輜東臨連界入長蘆之野凡屬經行之地正供者十
已蠲三更於倚閣之餘宿負者七仍免四道至直沽口
畔

駐雲蹕者五朝復念滄海涯邊近

天光者七邑曾屢沾乎渥澤望

幸原深併全貸其積逋承

恩尤渥是皆疊邀寬減又寬減之

特施定知久慶盈寧覺盈寧之倍益錫簫社鼓處處歌
吟蟹舍漁莊人入扑舞直覺迎舟之魚鳥亦似欣愉頓
令刺水之菰蒲皆增暢茂歡騰鄉遂慶溢郊圻臣等來
自田間叨登仕籍比樓臺之近水易荷生成聞桑梓之
逢春彌增悅懌雖風謠響答已皆上達於

宸聰而銜結情殷終擬仰申其私祝迎

鑾道左待叩額於華芝綵仗之前翹首畿南共馳懷於
桂楫蘭舟之側

恭謝

恩緩直隸一百七州縣新舊額賦倉穀摺子

乾隆五十九年

欽惟我

皇上道協生成心存懷保課晴問雨恒思稼穡之艱難
減賦寬征力挽陰陽之氣數屢年所貸殷畿之受惠實
多開歲以來禹甸之蒙

恩更渥

省耕浚泊三分之井稅皆蠲

駐蹕瀛壖七邑之田租全免固已漁莊蟹舍普周挾其
歡心至於汀鷺沙鷗亦相關以樂意乃麥秋之稍歉稷
奏纔聞值梅雨之方零

堯咨彌切念去歲原逢豐稔儲蓄雖存慮今年早使輸

將拮据未免時維孟夏正當春賦之期限以初冬緩待
秋成之後糴穀者無須五月物力均紓

回鑾者甫過一旬

德音疊降經五十九年之培養澤彌積而彌深合一百
七縣之封疆

恩愈恢而愈廣栽培無已感頌良深臣等叨侍
螭坳先聞

鳳韶恭承涵育泳化者喜徧郊圻側聽風謠頌

聖者聲連鄉遂升恒比壽惟齊呼

萬歲之三草木知

恩愧莫報百分之一

恭謝

恩恤直隸八十三州縣貧民分別賑借口糧摺子

乾隆五十

九年

欽惟我

皇上念切堯咨恩深禹甸課晴問雨每先事以綢繆發
政施仁必及時而補救昨已寬徵逋負恤一百有七之
災區今復加惠閭閻綏八十有三之下邑熒獨被周文
之澤胥得加餐借還仿朱子之規併蒙蠲息纔交夏至
猶當五月之中正藝秋田早給三旬之食先知稼穡信

睿思恒在民間乍捧

絲綸真曠典忽逢意外况今年宿麥收穫者雖止四分
然昨歲嘉禾蓋藏者猶支一載

仁風久洽本非無告之民甘雨新零又卜有秋之慶卽
不予以賑貸原自恬熙乃曲計其生成更爲籌畫有加
靡已共知此日之

天心寧濫勿遺益信從前之

聖諭風謠互答抃舞相隨

臣

等屢見

黃麻疊

頒赤縣南薰

舜曲一時解慍而披風北陸

義輪萬姓傾心而向日涓埃莫報惟代抒燕陲趙際之
輿情草木知春共遙拜柳水松州之

輦路

恭謝

恩命截漕撥帑籌備直隸賑務摺子

乾隆五十九年

欽惟我

皇上愛育多方仁施無已謀恒及早時籌畫於幾先事
未必然亦周防於意外邇以甘膏之少歉上厪
宸心遂以宿麥之未登疊宣

恩綽精誠有感喜好雨之頻零滋漉均霑已良苗之正
長况今年之節候夏至原遲卽曩歲之農占中元尚遠
連塍毵綠後種者不礙先收被隴雲黃春補者可無秋
助而乃愛無弗愛時深不獲之虞安益求安彌切如傷
之視觀露葉新鋤之後雖慰

皇情當霜鎌未穫之前終闕

聖慮寧使備而無用等諸棲畝之糧毋令緩不及時同
彼監河之粟聯名申謝郵章之

批答方還

駐蹕傳宣

行殿之德音又降稻翻白雪連檣分轉運之舟銀燦朱
提接軫出大盈之庫恐黎民之遷徙先期而示以
黃麻防墨吏之侵漁臨事而惕以白簡纖微必到識曲
相體恤之心誥誡維嚴信務使實霑之意覺五十九年
之久

聖慈與歲而俱增溯四千餘載以來舊史從前所未見
卽父母家庭之愛無此周詳惟

乾坤幬載之功方茲

高厚邦畿千里願長分太極之泉

眉壽萬年期永注長生之籙

恭謝

恩諭直隸總督實心賑恤正定等府屬被水州縣摺子

乾隆五十九年

欽惟我

皇上睿慮周詳天心仁愛近連禹甸偶逢二穀之未登

上廩

堯咨時切

九重之長算不待成災之日早爲防災未當施賑之期
先籌備賑殷勤拯恤謄黃之

天語爭傳委曲經營保赤之

皇情共識固已人心和樂有所恃而恬熙物候蕃昌應其時而暢茂邇以羣流合漲接河北之餘波因而諸郡承流浸畿南之下隰川原起伏在地形本有高卑困廩儲藏卽物力亦分貧富越阡度陌並非處處慳收比戶連閭不必人人待食相其稽事猶居半豐半歉之間揆彼民情實無已溺已飢之象故檢田履畝擬八月以爲期計口授糧待三秋而定數守臣奏牘原循用乎成規聖主勤民乃又逾乎常格先期早給俾預安澤畔之鴻按實詳稽毋偶漏轍中之鮒

丹毫數語見乾坤父母之心赤縣羣黎均風雨旃幪之

德九官恭讀咸三呼以祝

縣齡萬口喧傳已一日而周近甸在朝紳不耕而食尚
拜手以歡騰知農家含哺而嬉定聞聲而欣舞齊心同
願約早申葵藿之誠稽首陳詞不及待

絲綸之布

高深莫報惟共期壽山福海之延長銜結難酬姑代抒
壤叟衢童之歌頌

恭謝

恩免河間天津各屬積欠官修大名元城民隄賞給所

借籽種摺子

乾隆五十九年

欽惟我

皇上壽寓延洪恩膏稠疊事未形而早計綏寧每預於
幾先惠已溥而彌增錫恒逾於格外邇以滄瀛之下
隰宿雨未消兼之魏博之通川餘波忽溢疏防迅速時
時上厯夫

宸襟撫字周詳處處皆勞夫

睿算固已漁莊蟹舍寂無鴻雁之鳴月堰虹橋不畏魚
龍之舞而乃

天心仁愛博施寧濫而無遺

聖澤宏深子惠有加而靡已軫念九河之故地實匯羣

流毗連兩淀之通津易停積水前者歉收春麥正供業
已先蠲今茲甫檢秋禾舊負又復全免民力寬紓之後
更遣寬紓人心和樂之餘倍增和樂至於民修隄埝原
出閭閻官貸資糧例還倉庾何意舉焚而舉鋪悉支公
帑之金以及布種而栽秧均荷

溫綸之賜

德音下沛一時宣布乎陽平喜氣交融千里遙連乎渤
海十八屬宿逋盡豁見施仁之無吝於多一二邑僻壤
亦周識加惠之不遺於細先知稼穡無逸者道自延齡
敷錫庶民保極者德還斂福長聽郊圻鄉遂人人歌擊

壤之詩併見傑休兕離歲歲進稱觥之樂

恭謝

恩加銀米賑恤直隸併免三十三州縣積欠摺子

乾隆五十

九年

欽惟我

皇上久道符天深仁育物省春秋之耕斂恒軫民依調
金木之饑穰時關

睿慮屬以中州水漲注三鎮之遺疆因而諸淀波增趨
九河之故道

堯咨遽切屢詢訪乎艱鮮稷奏方聞早經營夫賑貸黃

麻

丹筆誠守吏者再三白粲朱提拯窮黎者巨萬固已家
家按堵轍少枯魚處處含飴澤無鳴雁而乃通津鷁首
更添棲畝之糧驛路驟綱重運鑄山之幣畿南閭閻殆
聚米以成山河北閭閻幾布金而爲地飛傳

溫綽羣驚爲格外所增逕集歡聲僉曰非意中所料况
乎官租倚閣原出

特恩民欠輸將自其定分在農曹議以半賜已仰體夫
天心乃

聖皇予以全蠲倍寬紓夫物力毗連諸邑爲州縣者卅

三檢校頻年所豁除者八億數雖多而不靳寧濫毋遺
逋已久而忽銷是真疑夢追呼不擾竟遇歉而仍豐耕
鑿無虞轉因災而得福合六遂六鄉之衆愧莫酬容保
之無疆仰

五代五福之堂惟益祝康疆之逢吉

恭謝

恩加展賑直隸二十四州縣摺子

乾隆六十年

欽惟我

皇上澤浹黃圖恩先赤縣得天久照六十年雨露原深
與物皆春五百里郊圻尤近賜租加賑撫綏無不周詳

減賦寬徵稠疊殆難縷述計金粟度支之數數比恒沙
論閭閻沾沃之深深逾滄海至去年之積潦經大吏之
上

聞彌軫艱鮮倍關

宵旰省耕省斂時時垂念其有無施貸施蠲處處預謀
其補救

命守臣以履畝用防一二之或遺

詔農部以持籌動輒萬千而不惜積逋盡免倍充裕其
蓋藏元氣全蘇業恬熙於耕鑿乃以多方宣洩雖無犬
上之河魚猶虞幾處飛鳴偶有未棲之澤雁深念昔疏

積水惟燕趙爲較深何緣今請增糧比魯齊而轉減
丹毫批答九官咸仰識

皇心

黃閣傳宣三輔遂又沾

聖渥先檢歉收之最甚賜粟六旬次稽罹患之差輕加
餐一月西大陸而東瀛海一千里胥沐

天膏北潞水而南廣川廿四邑共蒙

帝澤乍聞

溫綽眞夢寐之所不期溥洽歡心非歌頌之所能寫當
綺甲循環之歲惟祝

延年永久如干支之繼續不窮值上辛

祈穀之餘所期

受福駢蕃比禾麥之豐穰無數

恭謝

恩綏直隸上年被水州縣春季新賦捐子

乾隆六十年

欽惟我

皇上念切堯咨恩周禹甸綏輯者無庸再慮慮乃彌深
生成者靡以復加加仍未已前歲波濤偶溢忽驟落夫
河魚卽時

綸綍飛傳務輯寧夫澤雁給賑早儲其三鬴旋又頻增

緩徵初展以五年俄從全免農曹銷籍諸方之貸粟皆蠲租吏停呼積歲之宿逋盡豁咸愧承

恩之溢量敢更希

恩何期食福之多端仍蒙

錫福屬以

山陵展謁值寒食之方臨因而阡陌循行兼春耕之

親省土膏溥潤已占豐稔於西成農事勤勞彌軫艱難於東作預恐其賣絲糶穀輸納爭先或妨於炊黍蒸藜拮据不免例徵井稅雖當於梅雨以前念切民依

特展於麥秋以後春臺同上喜當紅雨之初霏夏景方

長直待黃雲之盡割花村柳陌錫簫合奏其歡聲蟹舍
漁莊社鼓導迎夫和氣無論衢童壤叟皆迎
翠輦而傾心卽茲驚序駕行亦捧

黃麻而額手乾坤懽載愧莫酬

高厚之恩海岳縣長惟羣祝

延洪之壽五百里郊圻近接常常就日以臚歡六十年
甲子重週永永循環於不盡

恭謝

恩免直隸五十二州縣積欠旗租摺子

乾隆六十年

欽惟我

皇上壽寓延洪福田亭育粵自丙辰

御極時時布澤於寰中至今甲子循環歲歲施仁於格外議蠲議賑拯恤者動輒萬千免賦免糧薄賜者更逾三四無微不至減除逮鹽竈之徵有惠必周寬貸及蘆洲之課

恩深春雨實至於加莫能加數比恒沙已覺其算難悉算至於分田制祿用以酬勲閭之勞計畝收租原不在公田之列初以佃人頑猾私徵者改使官徵旣而邑令侵漁吏欠者詭云民欠五百里膏腴相望都成畫餅之虛名六十萬簿籍空存全作鏡花之幻影陵八旗之生

計水求升斗而偏遲託百姓之流移莫引葛藤而未斷
徒以私家之逋負難使全捐何期

睿慮之周詳亦勞俯念權衡至當代償責守土之臣軫
念彌深懸債罷催租之吏賞延于世仍資養育於先疇
民返其鄉永免追呼於後日大寶鏡四洲畢照卽閭閻
一事而皆知太極泉萬品均霑爲典籍從來所未見讀
丹綸而額手真莫名壤叟之歡愉踞

紫殿以陳詞敬代達衢童之歌頌

恭謝

恩撫直隸災區分別蠲緩各項應徵租賦倉穀摺子

嘉慶

七年

欽惟我

皇上澤浹黃圖仁覃赤縣田功是念心知稼穡之艱難
民事恒勤歲省春秋之耕斂畢箕風雨久愜慰乎人情
金木饑饉務挽回乎氣數前者長波驟溢艱鮮偶奏於
虞廷因而荒政兼修補救更詳於周禮檢田有吏已蒙
寬三壤之徵藏富於民尙慮有一隅之歉

恩施無已廑懷偏重之災區籌畫多方彌養已蘇之元
氣爲常供爲貸項減倉儲之納者凡六萬餘或半賜或
全蠲除并稅之輸者計十四邑固已

乾元資始同霑雨露之滋何期

異命重申更荷

絲綸之沛昨以西連涿野夙存未化之魚苗漸聞南抵
弓高忽覩叢飛之蝥羽田祖偶遺於秉火稍致滋生農
夫適遇其傷禾或妨收穫在禾黍將登之後本屬輕災
乃痼瘵在宥之懷又施渥澤

特減五分之成賦俾免追呼均霑六邑之窮黎同歌樂
利衢童舞蹈徧空桐戴斗之區壤叟謳吟連析木通津
之野

龍章疊賁積慶忭以難名鳧藻聯趨覺頌揚之莫罄惟

期羣安耕鑿樂恬熙於三輔之昇平更祝齊耀升恒集
福祿於

萬年之眉壽

恭謝

恩減秋獮木蘭經過地方額賦摺子

嘉慶七年

欽惟我

皇上仁育無疆恩推自近

軒弧教戰丕承肄武之

鴻謨禹甸

觀風猶切勤民之至意值天膏之疊潤好雨知時當地

寶之將登初秋省斂津通析木出留幹之雄關林接長
松拓朶顏之舊壤青畦翠隴層層映四面雲山白叟黃
童處處聚萬家烟火前代邊防之甌脫郡縣區分
先朝王會之爰閭賁琛久待望

鑾輿者四載夙切謳思

駐清蹕者七程共欣瞻仰雖曰清塵灑道實無礙於農
功何期賜復蠲租乃早蒙乎

帝澤緬維舊制原十分祇免其三

特減正供竟一歲僅輸其半長城南北同占風雨之從
星

輦路東西尤似樓臺之近水歡心浹洽聞齊呼

萬歲者三和氣蒸濡定來備八徵之五

恩真逾於常格感自倍於恒情臣等幸託殷畿近依

堯日畱京者恭聆

綸綍抃舞良深扈從者親聽風謠見聞更切徧傳梓里
喜雨露之偏霑徒抱葵心愧涓埃之莫報惟祝添籌海
屋儀璘耀而

聖壽縣長更期洗甲天河彗孛燿而

皇心慶慰

紀文達公遺集卷第五

紀文達公遺集卷第六

孫樹馨編校

表 露布 詔 疏

擬

賜宴瀛臺聯句併

錫賚謝表

乾隆十二年
順天鄉試

乾隆十一年某月某日具官

臣

某等恭遇

上以運際重熙時逢大有

特召宗室廷臣分日

賜宴瀛臺賦詩聯句賞花釣魚

錫賚各有差以昭宣豫慶豐之至意

臣等謹奉

表稱

謝者伏以

皇慈霧洽雅叶夫酒醴笙簧

聖渥天浮道契夫賡歌颺拜秋深桂苑蓼蕭沾濃露之
華日麗繪峯葵藿依太陽之照集公姓公族以式燕玉
牒生光合大臣小臣以分榮冰銜動色靈槎八月真同
海客之游廣樂九成似返鈞天之夢屏藩有慶簪組騰
歡臣等誠惶誠恐稽首頓首上言竊惟世道昇平著太
和於有象朝廷清暇敷愷樂以無疆鼓吹休明必有詠

歌之作潤色鴻業爰申燕樂之文故象協鳳梧誌卷阿
之雅會興傳魚藻留鎬邑之遺風鹿鳴以下共六詩君
歌臣答白華而後爲一什誼美恩明天王燕則諸侯毛
司儀夙傳其職掌正歌備而太師告禮經亦著於典章
在先王皆具有明徵及後世乃別名曲宴柏梁臺上藩
封以逮於郎官葡萄宮中宰執兼隨以學士五王共宴
花萼樓頭三等分評曲江亭畔咸亨之會二王同太子
俱從麗正之筵兩相暨禮官咸在情契荆枝之句興慶
移鑾詩吟花柳之天樂游置酒莫不燕衍於暇豫用以
祝頌夫太平然而大陵享神歸藏旣誕洞庭張樂莊叟

尤夸汾水新詞不入西山之錄瑤池舊事浪傳汲冢之
書雖有其文蓋無足道未有沐浴深仁醉以酒而飽以
德昭宣盛典禮同節而樂同和如

今日者也茲蓋伏遇

皇帝陛下

虹壁當陽

龍圖啟運

澤洽四表薰風入舜帝之琴

德訖八荒瑞露浮高辛之甕雲生於牖松生於棟無爲
宰萬化之原樂以爲御德以爲車有道識

一人之慶固已民康物阜不殊華胥之游遠又邇安宛
似春臺之樂九年耕而三年食世登含哺鼓腹之天十
日雨而五日風人識位育中和之化史官載筆於玉署
頻登大有之書

天顏有喜於瑤階爰下推恩之典用相交於上下務兼
備夫情文乃移

法駕之清塵焚香灑酒聿舉趨陂之高會鼓瑟吹笙乘
泰運者百三年再行曠禮遇中秋者十二日先及懿親
或慶衍於螽斯或派分於麟趾文昭武穆盡周家子姓
之班東平河間皆漢室宗盟之望昔年故事曾裁桐葉

以分圭此際遭逢更叶棣華以侍宴未央二十萬之賜
方此未多唐皇十六宅之榮覺其尚陋迨乎翼日遂及
羣臣落望後之仙萸尚餘兩葉問重陽之瑞菊僅隔十
朝則有輔弼依垣列三台以拱極卿士惟月分九道以
從星鵷鸞集藜閣之英黿峯日曉獬廌映柏臺之繡烏
署霜寒官司鹽梅俱陪嘉會班聯槐棘咸預清行職盡
清華鄭鮮之未容啟事人兼風憲李栖筠亦得從游儀
肅冠裳列分左右時乃

仙車九九降來五色雲中玉珮雙雙隨過百花橋上參
差貝殿疑浮弱水之三千隱現珠樓似見崑崙之十二

滄洲曉氣化爲宮闕之形閭闔秋風吹入金銀之樹舟
浮太液驚黃鵠以翻飛帳啟昆明淩石鯨而問渡指天
河之牛女路接銀潢搴秋水之芙蓉域開香國尋芳曲
徑惹花氣於露中垂釣清波起潛鱗於荷下檀林瑤草
似聞金谷之郁芬桂餌翠綸喜看銀盤之撥刺大官賜
膳雲圖蠶刻之尊光祿傳餐漬桂釀花之酒青龍布席
白虎執壺四溟作杯五嶽爲豆琳瑯法曲舜韶奏而鳳
凰儀渾穆元音軒樂張而鳥獸駭紅牙碧管飛逸韻以
千雲羽衣霓裳驚仙游之入月莫不神飛而色動共酌
太和咸覺心曠而情怡同餐元氣遂乃集枚馬呼應劉

歌詠清平揄揚盛美

天章首煥落一串之驪珠

御筆高標扛百斛之龍鼎萬天浩唱不推羲繩以前叢
雲奧詞漫道媧竇而後因之句成七字仿漢事以聯吟
人賦五言分唐詩而探韻宮鳴商應俱協和聲璧合璋
分細裁麗製歌叶八伯共依紉縵之華頌出九如齊上
岡陵之祝當茲颺言以拜手彌增嘉慰於

宸衷鴛綺七襄抽仙絲於香草鸞牋十色分妙製於桃
花織天女之金梭名高蜀郡呀吳都之銀粉價壓膠東
玉井波寒濯瓜桃於懸圃鐵船渡遠分蓮藕於華山帶

去歸鞍香拂青絲之籠傳來中使光搖赤玉之盤皆得
攜出人間爭識來從

天上西苑賜游之嘉話曾何足云北門侍宴之恩榮無
能過此笑貞觀豐年之慶筵啟丙辰陋開元麥秋之登
樽稷端午千秋曠禮萬古奇逢洵哉遊豫之風允矣泰
交之象臣等才同樗櫟器謝棟梁藻有愧於掞天賦未
堪以擲地濫列金章之寵叨分玉局之班簪白筆而莫
效涓埃侍黃門而多慚獻替六鰲雙鳳知點竄之難工
九几五筵屬遭逢之有幸得與鹿羣之會彌增鳬藻之
思伏願

化洽邳隆

治超皇古無逸而乃可以逸常軫夫康功田功已安而益求其安每惕夫一日二日撫池臺之勝槩則思靈囿之子來對魚鳥之親人則思妣王之威若觀九族之燕笑則思自親睦以至平章顧千官之肅雍則思正朝廷以及邦國賞花而念貢花之非禮勿信其小忠垂餌而知食餌之不情務察其大僞供來芳饌莫忘瘦嶺之耕人捧出霜綃當廛寒江之浣女樂諧韶濩致戒夫琴瑟之專詩被管絃務親夫風雅之正則官爲君商爲臣角爲民徵爲事羽爲物音有五而協氣常調肅時而又時

賜哲時煥謀時寒聖時風疇次八而休徵咸應銀繩玉
檢不數夫七十二君玉燭金甌永固於百千萬世矣臣
等無任瞻

天仰

聖激切屏營之至謹奉

表稱

謝以

聞

擬修葺

兩郊壇宇及

先農壇告成謝表

乾隆十九
年會試

乾隆十八年某月某日具官

臣

某等恭遇

皇上崇效卑法務本重農

特發帑金簡命大臣修葺

兩郊壇宇大工告成復

命修整

先農壇殿廣植嘉木以昭祇肅明禋之至意

臣

等謹奉

表稱

謝者伏以

皇朝光祀典經營盡效法之誠

聖主重田功崇飾祈耕耘之利示勤示敬構鴻基於丹

獲垣墉美奐美輪酬嘉種於稻梁黍稷黃琮蒼璧萬靈
翕合其神光黛紉轅千畝遙連其佳氣祭則受福知
明察之無違政在養民卜順成之有應神人胥洽中外
騰歡臣等誠惶誠恐稽首頓首上言竊惟膺圖受籙必
叶契於幽明崇德報功惟告虔於禋祀千五百神之祭
最尊者莫過乾坤一十二禮之中尤重者在於郊社黃
帝以前莫考漢人僅述其明堂有虞以後畧詳舜典特
書其柴望載稽樂律始分冬至夏至之文粵考禮經乃
著泰折泰壇之號自斯以降雖分合之屢殊依古以來
要尊崇之不異文皇中禋神祠及壇墠兼修宣帝初年

北社與南郊並廣朔遺聞於元始典重茅營考前志於永明制更瓦屋太和異數特傳親築之文建武新規爰有改修之詔七十二級之制命殿帥於紹興八尺一寸之圖遣太常於廣順凡以欽崇天道敬迓嘉祥至於食乃民天貴先知夫稼穡福由神錫宜大報以馨香陳籍而祈載在韋昭之注吹豳以樂詳於鄭氏之箋炎漢舊儀祀惟乙日開元新禮埴在壬方歆用柔毛曾紀天興之歲薦以大武夙傳太始之年梁普通兆域新移特營北岸唐貞觀藉田親祭定議東郊皆王政所以重農而祭法不忘報本慨自秦營西時陳寶爲祥漢拜甘泉白

麟後瑞太一而配以五帝天有六名神州而兼及崑崙
地分二位誤解上辛之所穀幾廢冬郊致疑六月之披
裘每停夏祀劉蘇詰難交爭詩序之文霍夏紛紜附會
同牢之禮或有宋家教主罷祀先農唐代禮官併歸王
社元和以前五十載藉田則禮已無徵洪武以下十二
朝登極乃君爲親祭未有五材俱庀肖儀象於方圓百
穀用成備典章於祈報落成有慶萬年培永命之基經
始方新四海兆豐年之福如
今日者也茲蓋伏遇

皇帝陛下

道高參兩

治感神明上下同流元氣叶鴻苞之運雨暘時若休徵
驗庶草之蕃祀事孔明夷典禮而夔典樂人時敬授羲
秩東而和秩西固已甘露醴泉具昭不應嘉禾瑞麥俱
獻祥符猶

念保佑有由元命夙凝於有德旦明匪懈至誠宜將以
隆儀不有鴻規奚昭大禮惟茲升煙達氣典莫重於
園丘至於瘞玉求陰祭更嚴夫

方澤爰卽詳明之制更爲修舉之謀宗伯具儀太常襄
議司天卜吉水部鳩工分奠方隅順陰陽於子午宏開

門戶法闔闢於乾坤陞起三成倚蓋肖形於環轉塘開
一鑑覆匳取象於觚棱繚垣回繞以如規圖成太極周
道折旋以應矩水記方流天仿蔚藍望清虛於一大界
真金色符土德於中央雪捧樓臺隱約露碧城之影月
明棟牖霏微占黃氣之祥風雲瞻拱衛之尊集衆靈而
將事圭璧備薦歆之禮待二至以

親臨從此八陞四通倍增壯麗因之九成三獻彌覺森
嚴蓋惟王者得行克備夫駢角黝牲之禮益信仁人能
饗式格夫

皇天

后土之靈加之敬

天者因以勤民於是重農者大爲報本凡茲羣祀皆爲祈福於蒼生維此

先農尤欲降祥於穡事雖不比陶匏藥秸合樂於六變八變之餘亦必因青輅朱紘升香於三推五推之日飭水衡以趨事大發錢刀趣將作以鳩材鼎新土木梁雕瑇瑁鄧林遠集其梗柁瓦疊鴛鴦陶氏聿新其埏埴梓人面勢斤運成風巧者呈能聖明如玉鋪雲汗雨庶人皆樂事而勸功鳥革蠶飛崇構可剋期而竣役更移嘉樹俾長新榮依瑤砌而分枝簷牙凝碧映春旗而一色

馳道浮青風籟微吹響雜祈年之琴瑟煙條匝布陰沾
終畝之犁鋤卽看柯夏青銅百尺動龍蛇之影定知葉
分翠幄千年闕禽獸之形當其林茂鳥歸爭依神樹至
於堂成燕賀永奠靈區蓋不日而告成將有秋之必應
從此

帝閭南北

兩郊之瑞霽遙通亦且達路東西萬代之崇基對峙立
心立命萬國咸寧卜世卜年三靈俱叶格於

上帝受釐可祝於無疆穀我農夫建極因爲之錫福感
通有應沾漑靡涯臣等材謝駿奔業荒學殖志成郊祀

乏班固之雄文賦就藉田無潛安之麗藻乾稱父而坤
稱母相宗子以何能義以耨而禮以耕比真儒而多愧
恭逢明備莫効涓埃伏願

撰協清寧

惠深懷保成命聿歌夫周頌對越彌虔農功俾繪夫豳
風勤勞常軫官以禮樂克修夫同節同和省以春秋時
補其不足不給知感孚之有本益勤明德之馨香念呼
吸之可通倍凜庶徵於備敘則百神受職將陽愆陰伏
之俱消萬寶告成自甘雨和風之順應金甌永固握寶
籙而延年玉燭長調啟瑤階而坐治矣臣等無任瞻

天仰

聖激切屏營之至謹奉

表稱

謝以

聞

欽定四庫全書告成恭進表

乾隆四十七年

臣等奉

勅編纂四庫全書告成謹奉

表上

進者伏以

天璣甄度書林占五緯之祥

帝鏡懸光藝苑定千秋之論立綱維於鼇極函列雲珠
姬刪述於龍蹲契昭虹玉理符心矩絜三古以垂謨道
叶神樞匯九流而證聖治資鑒古德洽敷文臣等誠歡
誠忭稽首頓首上言竊惟神霄九野太清耀東壁之星
懸圃三成上帝擴西崑之府文章有象翠嫵遂吐其天
苞繪畫成形白阜肇圖其地絡書傳蒼頡初徵雨粟之
祥籙授黃神始貯靈蘭之典洞庭祕簡稽大禹所深藏
柱下叢編付老聃以世守秦操金策聖籍雖焚漢理珠
囊遺經故在儒生密寶維孔鮒之承家謁者旁求見陳

農之奉使蝌文以後篇章自是滋多麟閣所儲條目於
焉漸備杖吹藜火夜讐別錄之編衣染鑪香坐校中經
之簿王仲寶區其流別定新志之九條阮孝緒撮其叢
殘括舊傳之五部勘書妙畫世摹展氏之圖捲幔飛仙
史載隋宮之蹟唐武德訖乎天寶鈿軸彌增宋景祐繼
以淳熙牙籤再錄南征俘玉元遷三館之嚙北極營都
明運十艘之積莫不前徵邃古丹壺溯合雒之蹤茫發
空林青簡犴頻斯之篆西州片札辨點漆於將磨南雍
殘文檢穿絲於已斷竹編未朽名認師春瓠本猶攜橐
存班固爬羅纖碎或得諸玉枕石函掇拾畸零均給以

螺丸麻紙精鏤廣購一篇增十匹之酬華贖重緙三品
別兩廂之等凡以窮搜放失獵文林辨囿之精互鏡瑕
瑜立聖域賢關之訓結德輿而輶輶軌順經涂俸學海
以沿波源通道筏然而掇餘易匱四千卷既丐殘膏鰲
廣彌蕪百兩篇更珍贗鼎丹青失實或貽誚於王充朱
紫相淆孰齊蹤於鄭默甚乃別風淮雨惜奇字而偏畱
或如許綜紉紅踵駁文而莫悟蘭臺庋貯多如賄改漆
經棗板摹傳遂至誤尊閣本故祕書總目鄭夾漈復議
校讐而文苑英華彭叔夏重加辨證從未有重熙累治
雲華懸紫極之庭稽古崇儒冊府闢丹宸之館彌綸宙

合識大識小之無遺榮鏡登閣傳信傳疑之有準金模
特建寶思周融如

今日者也欽惟

皇帝陛下

瑞席蘿圖

神凝松棟播威棱於十曲響震靈夔洽文德於四溟兆
開神鷺

帝嫺歌詠已題九萬瓊牋臣向編摩更緝三千寶牘博
收竹素仍沿天祿之名珍比琳瑯永付長恩之守乃猶
尋端竟委溯支絡於詞源緯地經天探精微於義海昭

陽韶歲

特紬翰府之藏永樂遺編

俯檢文樓之帙例取諸吳興韻海割裂雖多體宏於孟
蜀書林蒐羅終富榛楛宜翦

命刊削其調言瀝液堪珍

勅比排其墜簡焦桐漆斷重膠百衲之琴古罍銅斑合
鑄九金之鼎復以羽陵蠹剩或有存畱宛委藏餘不無
佚漏十行

丹詔徧徵汲古之家七錄湘囊廣啓獻書之路逸經斷
策出自大航雜卦殘篇發從老屋錦帆揜舵孟家東洛

之船玉軌飛鈴吳氏西齋之軸鱗排玉宇多王桀之所
未聞箴束金繩率張華之所莫識光明繭紙朱題芸帙
之名蟠屈鸞章紫認槐廳之印紅梨隔院曹司對設於
東西青鏤濡香品第詳分其甲乙

天潢演派光連太史之河卿月澄暉彩接文昌之宿總
司序錄叨楊億之華資分預校讐列任宏之清秩銀袍
應

召驤雲路以彈冠粉署徵才記仙郎而題桂懷鉛握槧
學官願効其一長切線割圓博士亦研其九術遂乃別
開書局特分署於

龍墀增置鈔胥競抽豪於虎僕圖與史並陳左右粉本
鉤摹隸與蚪兼備古今絲痕蠅扁曹連什五各隸屬於
寫官工辨窳良均稽研於計簿提綱挈領董成者職總
監修補闕拾遺覆勘者官兼詳定庀器預儲於將作斐
几筠簾傳餐徧給於大官珉糜珠餽溫鑪圍炭紋凝鵲
鷁之青朗麗涵冰色映玻璃之白花甌入直地同兜率
天宮蓮炬分行人到瑯嬛福地瓊箱牒送全搜膾囊惟
蓋之餘

芝殿鍛排共刊木扇金華之謬程材效技各一一而使
吹累牘連篇遂多多而益辦香霏辟惡擁書何止百城

瀋漬隄靡削橐寧惟兩屋簷入衆香之國目眩瞽於花
光宛遊羣玉之峯神愕眙於寶氣豈但鴻都多士駭聞
見所未曾實令虎觀諸儒辨妍媸而莫決所賴恭承
睿鑒提玉尺以量才仰稟

天裁握銀華而照物初披卷軸共掇零璣卽荷

絲綸務讜完璧吳澄易翼辨顛倒乎陰陽楊簡詩音斥
混淆乎周漢稗官勦說刪馬角之荒唐譯史傳聞摘象
胥之譌異醮章祈福發凡於劉跂之詞語錄參禪示例
於齊原之記固已南車指路陟道岸而衢亨

北斗旋杓揆文星而度正泊乎羣書大集品雜金沙

聖訓彌彰鑒澄珠礫詰經忌鑿黜錯簡於龜文論史從
公溯編年於麟筆立言乖體四明之錄必刪贗古誣真
五柳之名宜辨七籤三藏汰除釋老之編五蠹九奸排
斥申韓之術毒深孔雀無容校寫其青詞巧謝璇璣未
許增添其錦字小山豔曲削香匳脂盞之篇金谷新詞
刊酒肆歌樓之句凡皆詞臣之奏進誤點丹黃一經
聖主之品題立分白黑至於銅籤報夜

紫殿

勤披

玉案開緘

丹臺

親詠五家易說歧塗附闢其傳燈四氏書箋餘緒兼詳
乎括地前車後鑒陳風雅於經筵斜上旁行寓春秋於
世本廬陵處士特申僭上之防安定門人大著尊王之
義王元杰名同讞獄爲雲谷之重儻洪容夔跡類探囊
竊玉川之餘瀋四箴誤註寧知顏巷之心二佛同稱轉
隘尼山之量六經作繪全收諸楊甲圖中七緯成編知
出自莊周書後五音分配篆文互備其形聲二史交參
奇字各通其假借古香醺醺細辨班書碎腋穿連重刊
薛史清流肇釁示鑒戒於東林正統明尊存綱常於西

蜀派沿涑水袁朱之新例兼存俗記扶餘班范之訛傳
並訂黨碑再勒嗟揖盜而開門權燄彌張嗤教星而替
月西湖游蹟殊憐野老之藏名北使賓筵深陋詞臣之
校射宋鈔僅贖蒐舊志於臨安金刻稀聞寶遺文於貞
觀或攻或守徒從十鑑之兵謀相勝相生未信五行之
德運建炎政草愧彼中興至正刑章斥其左袒李尊洛
學辨道命於天原酈註桑書剖源流於地理史腴詳摘
有逾漢雋之精經笥懸探更勝曹倉之富至於孔庭舊
語首定儒宗蔡帳祕文嚴排異說范祖禹之帝學具有
淵源曾公亮之武經姑存崖畧橫戈危堞節取陳規握

策靈臺參微蘇頌算窮杪忽九章研鮑瀚之藏術雜縱
橫十卷稽趙蕤之撰楚中隱士互權韓柳之評婺郡名
賢不廢呂唐之學臚登識記衍洪範而原非妄議井田
託周官而更誤錢唐遺事深譏首鼠於宋元曲洎舊聞
微憾操戈於洛蜀絀聰有取旁通方朔之言指佞無難
慎聽韓非之說陳思書苑列筆陣而成圖馬總意林舉
詞條而擢秀黃伯思之博洽石墨精研孫逢吉之淹通
雲龍遙溯多知舊事病歌舞之銷金一洗清波笑詞章
之諛墓太平御覽徒粉飾乎嘉名困學紀聞偶抨彈其
迂論晚唐小史入廚寧取乎卮言南宋枝談按鞫深嫌

其曲筆十七卷騷人舊製更證以草木之名二百年吏
部清吟特賞其煙霞之氣兼推韓杜續來鳳翥之膠並
採郊祁擬以棠華之句文恭著作先歐尹而孤行忠肅
風裁抗蘇程而角立勤王畱守呼北渡者凡三殉節侍
郎壯南朝者惟一學如和叔原不限以宗朱詩到儀卿
乃轉嫌其入墨讀書祕閣明詹初論古之非從宦金淵
賞仇遠耽吟之癖楊維禎取其辨統而頌萃則當誅劉
宗周閔其完忠而吠堯爲可恕凡茲

獨斷咸稟

睿裁懿此同情實孚公義苞千齡而建極道出於

天綜百氏以歸型言衷諸

聖權衡筆削事通乎春賞秋刑絜度方圓法本乎

乾規坤矩是以儀璘懸耀揆景鳧超鏞棧先鳴聆音麇
集鯨鐘方警啟蓬館以晨登鶴籥嚴關焚蘭膏以夜繼
披文計數寧止於萬七千篇按月程功務得夫四十五
日裁縫無迹先成綴白之裘傳寫相爭齊炙汗青之竹
架羅黃卷積盈有似於添籌几擁烏皮刊謬時防其掃
葉畢昇活板漸看字是排成曾鞏官書已見序稱校上
加以

乾行至健

七旬之念典彌勤

離照無遺一字之褒譏恒審梁騶練士庚郵遞初寫之
函

雲輅巡方乙夜展重修之卷至三至再戒玉楮之遲雕
數萬數千摘金根之屢誤坤原爲釜兼搜刊板之訛芊
或作羊細檢鈔書之謬豪釐不漏戩旁添待補之戈塗
黠必嚴羅上辨續加之罔削除不盡時

飭以妄下雌黃輪郭空存常

指其竟同曳白

明周纖芥共欽

睿照無遺報之微涓彌覺愧心生奮若夫考勤校脩督
課雖詳荷寵邀榮

恩慈實渥風雲得路先登或列於九官

雨露均滋中考亦賜以一級柏梁聯句聽鳳律之新聲
芸署題名踵麟臺之故事墨勻蝶翅祖帖雙鉤帙簇龍
紋

天書五色猩毛擢穎膩魚子之華牋龍尾雕紋融麝煤
之芳氣銀罌翠管細縈百和之香錦段香羅交映五明
之扇繡囊委佩鋌貯朱提珍毳豐茸怕裁白氍毹盤列
飴果分西域之甘華俎嘗新瓜勝東陵之種自

天宣賜多非夢寐所期無地酬

恩惟以文章爲報周賅始末擬勒長編別採英華先爲
縮本曩長庚之紀歲慶叶

嵩呼屬太乙之占祥象符奎聚八年敬繕挹古今四庫
之精兩部分儲合大小二山之數惟全書之浩博實括
羣言合衆手以經營倏逾數載香薰蘭櫝方粗就而未
終閣聳雲楣已先成以有待文河疏濬初如江別爲三
筆海朝宗繼乃瀆增以四望洋無際慮創始之爲難登
岸有期幸觀成之可冀較刪繁之別帙又閱兩年勒總
纂之鴻裁已盈一部插籤分帙次按乎甲乙丙丁列架

臚函色別其赤青白黑經崇世教貴實徵而賤虛談史
繫人心削誣詞而存公論選諸子百家之粹博收而不
悖聖賢懲十人九集之非嚴汰而寧拘門戶上沿虞夏
咸挹海以求珠下采元明各披沙而見寶六千篋璋分
圭合延閣儲珍二百卷部次州居崇文列目釋名訓義
因李肇之解題考異參同近歐陽之集古事稽其實循
文防誤於樹置詞取其詳求益非同於買菜人無全美
比量其尺短寸長語或微疵辨白其玉瑕珠類一經採
錄真同鯉上龍門附載姓名亦使蠅隨驥尾元元本本

總歸

聖主之持衡是是非非盡掃迂儒之膠柱至其盈箱積
案或汗漫而難尋復以提要鉤元期簡明而易覽譬諸
典謨紀事別行小序之一篇類乎金石成書先列諸碑
之十卷分綱列目見義例之有條按籍披圖信源流之
大備水四瀛而山五岳俾此壯觀前千古而後萬年無
斯巨帙蓋非常之制作天如畱待於今而希有之遭逢
人乃躬當其盛叨司校錄實忝光榮臣等功謝囊螢識
同闕豹鑽研文字未能脈望之逢仙延緩歲時僅類鞠
通之食墨仰蒙

訓示得聞六藝之源曲荷

寬容許假十年之限百夫決拾望學的而知歸一簣成
山營書巖而幸就欣陳寶笈對

軒鏡之澄光恭進

瑤階同義圖之永寶從此依模範狀若疊矩而重規因
之循軌知途益輕車而熟路先難後易一隅可得而反
三謀始圖終百里勉行乎半九精心刊誤八行細檢朱
絲協力鳩工萬指齊磨烏玉連綿告蕝竚看四奏
天闔迅速先期不待六更歲籥人文成化

帝機運經緯之功

皇極敷言

王路示會歸之準觚棱雲構崑莪乎銀榜璇題方策星
羅珍貴乎金膏水碧曰淵曰源曰津曰溯長流萬古之
江河紀世紀運紀會紀元恒耀九霄之

日月並五經以

垂訓道通乎丹書綠字之先合六幕以同文治超於元
律蒼牙之上臣等無任瞻

天仰

聖踴躍歡忭之至謹奉

表恭

進以

聞

此集中第一篇大文字蓋四庫全書開館吾師
卽奉

命總纂自始至終無一息之間不惟過目不忘而精神
亦足以相副經手十年故撰此表振筆疾書一
氣呵成而其中條分縷晰纖悉具備同館爭先
快覩莫不歎服總其事者復令陸耳山副憲吳
稷堂學士合撰一表屬吾師代爲潤色改就終
不愜意仍索此表書兩人銜名以進乃

高宗純皇帝明鏡高懸謂此表必係紀某所撰遂

特加賞一分咸驚

睿照之如神也今刻入集中謹識於後門人劉權之

平定兩金川露布

乾隆四十一年

臣聞威揚星鉞非螳斧所能支怒奮雷殛雖蠶叢而亦
關應天者勝定申四冢之誅恃險者亡難負三苗之固
故王師仗順歷百戰而無前遁寇偷生終一朝而就繫
靈夔震吼西人之膽全寒雄虺摧藏南粵之纓遂繫恭
承

睿畧已縛渠魁竊惟兩金川者俗帶蠻荒人原羌族金
牛關道爲五丁未鑿之餘玉斧分疆在一水相連之外

九氏雜處率遺種於冉駝八國參居盡隸名於默噉路
通的博問唐成而皆迷郡接汶山出漢封而更遠蓋四
萬八千歲後至建興始控以城而五百六十人中在嘉
靖尚名以寺羈縻勿絕古來徒繫虛名叛服不常此輩
遂成天性洎我

朝龍驤討罪初定峨岷狼種傾忱全收印笮桃關置埃
已歸版籍之中幢布輸寶久定臣民之分百年培養漸
如奚別東西兩部區分遂似宛名大小沐

天朝之雨露各長子孫割蠻土之山川自成聚落而乃
中山狡獸最解忘恩西部遺羌從來善盜包藏桀黠縱

橫黃石之墟突肆貪殘蹂躪青衣之外吠同蜀犬忽爭
骨以磨牙毒類巴蛇竟壁山而掉尾往者戊辰之撻伐
玉弩騰芒實因郎卡之憑陵銅頭興暴乃以驚弦落羽
梟不東飛負矢哀鳴鵑知北向

天心仁愛許還松堡之師

聖度宏寬容免竹王之戮凡以綏柔荒裔俾板楯之知
歸何期孤負

深恩仍夜郎之自大爪牙暫戢密蓄機心羽翼未成轉
修舊好吐蕃嫁女羈勃律之歸唐汧罕釋讐結先零而
窺漢陰謀未遂十稔先盈遺孽猶存九嬰彌亂凶殘有

種索諾木虺復爲蛇貪冒無知僧格桑狐因假虎莎車
搆怨稱戈鄯善之城般囑興戎喋血羅支之帳四鄰俶
擾月明而軍柝宵驚二豎披猖風吼而戰雲晝起釁生
同室雖爲蝸角之爭境接中原漸慮犬牙之錯屢吹毒
焰似聞旺烈遺風敢播謠詞擬逼姜維故壘蓋兩階干
羽終莫格其頑心八陣風雲自宜申其顯討乃以邊臣
許左未能宣布

天威閩帥謀疎無以欽承

廟算始則印歸邛谷陽受約而彌驕繼乃城屬兜題已
失巢而復得僧格桑投林兔免將三窟之重營索諾木

振羽奇鷁更九頭之彌黠借降人以用謀初同婦嫁維
州畱部長而不歸正似王囚阿惡迹其質渠以割地具
有深謀足知挾衆以窺邊終爲後患敢圖悖逆僉云罪
已通天苟不翦除深恐勢將滋蔓

皇上是以威操湯鉞迅調銅符武震軒夔重開玉帳乾
隆癸巳六月

詔以臣阿桂爲定西將軍以

臣

豐昇額

臣

明亮爲之副

握虎鈴以命將星動河魁引鶴列以陳師風馳山子旗
分柳綠滇黔秦楚之兵襦映花紅彭濮微髻之卒宣明
賞罰令嚴而壁壘一新簡汰疲瘵氣奮而笳簫倍響復

以

禁中羽騎初時未果從征因而城上蜚弧所向莫爲前
導牙璋飛召爰蒐健銳之雄櫜鼓交鳴併簡索倫之衆
攜來飛矢天邊齊射狼星倚作長城閫外寧驚鵠唳四
奇四正共成風后之圖九拒九攻誓覺溫禺之血龍吟
畫角雪山之亂石皆鳴馬振連錢玉壘之危峯欲動蓋
將永清乎邊徼務在擒王所以大合乎軍鋒不辭用衆
星樞高挈周萬里以提衡地絡歧分用三驅而取道
睿謀指示共瞻

軒帝南車衆志驍騰齊出益州北部一軍別駐俾成寔

尾之形兩路兼攻各據擣虛之勢山川聚米已全境之
周羅戈甲捐雲乃中權之采入是歲十月臣阿桂等由
資哩諸處進兵收復鄂克什官寨芙蓉淬刃新軍皆初
試之鋒薜荔懸厓舊路是曾經之地較人宵潰競自棄
其印籠楚幕晨空俄全清乎甌脫川原如故已遷之邾
鄱仍歸井竈不移待救之江黃先慰十一月進攻路頂
宗明郭宗收復美諾千重鬱律青壁無梯一縷延緣黃
雲迷徑當年伏莽僧格桑藉以潛藏此日負嵎索諾木
恃爲障蔽崇墉再伐尚因壘而不降齊燼重收竟背城
而思戰櫓槍燄吐囂矜之氣方張睥睨塵昏格鬪之聲

遂合風生勁弩平驅犀手三千雪壓危巒直接雲梯七
百弓刀爭響陵嶒之石骨皆摧樓櫓平頽睽睨之旄頭
倏墮揚旂撾鼓一時三逐殘兵按籍披圖兩日再收故
地闢其門戶已椿長狄之喉撤彼藩籬早斷匈奴之臂
甲午正月進攻谷噶丫口初臨寇境一九早已泥封橫
阻前茅千嶂都如笏插蜂房密綴異敗亡鳩合之餘虺
毒橫吹正僥倖鴟張之後銅丸走坂憑高者藉勢囂爭
石角鉤衣躡險者排空馳突弩張劍拔兩軍之銳氣皆
新雷轉山驚三鼓之餘音不竭喧呼沸地似翻骨母之
潮煙燄迷天忽結蚩尤之霧戰酣不解應龍之翼彌張

力竭難支妖鳥之巢乃覆於時臣明亮亦由赤丹爾思

攻破馬尼牙旂並建輔車之勢相維羽檄遙通犄角之

形早據獨當要路旣無旁顧之虞徑擣中堅益奮直前

之氣三月臣阿桂抵羅博瓦外郭是恃秦人倚函谷之

關舊壘原堅晉帥阻偏陽之國四峯矗立高深皆自難

窮八壘回環左右多能相救羊腸詰曲非一旅所能攻

蛙徑紆環乃五軍之並進分朋列隊數符太乙之旂飛

矢揚兵氣壓常山之陣參差遞起驚飄瞥之無恒蹊跋

橫行駭枝梧之不定山精血染倏半化於青燐木魅巢

傾遽罷吹其碧火曾以風吹山帶乍浮迎陣之雲水挽

天河預灑洗兵之雨苔衣夜滑未利行師嵐氣晨蒸且
畱養銳計其時日正同虞帝之七旬簡我車徒乃及宣
王之六月是月克色泐普進克喇穆喇穆及日則山口
七月又克該布達什諾木城及格魯瓦角諸寨兩軍夾
擊都如絕地而飛一隊潛行忽似自天而下四山陰合
霧濃而伏豹爭騰萬木聲號雨急而怒龍奮攫蠻氍密
挂雖側足以難登鬼彈驚飛終仰攻而不避丹厓平裂
真彎沒石之弓翠巘中摧如有破山之劍轉鬪萬峯之
下幾歷千盤出師一月之中因成三捷兼以橫摧鉤楯
道如刊木而通因之徧熱團焦勢似焚山而獵雷能破

柱一聲而斷柿紛披火自生風四顧而殘煤全舞地中
鼓角真草木之皆驚雲外旌旗早山川之相望重巖複
岫巨靈之蹠齊開羈魄殘魂貳負之尸遂械然而大軍
未合猶紆道以求通黠寇多歧當出奇以制勝披榛得
路一時幾費躊躇括地成圖萬里乃蒙

鑒照與

天合契信必克而無疑惟

聖前知果圖功而有獲十月由日爾八當噶之下柴噶
爾博之上取道攻得默格爾進據密拉噶拉木併克凱
立葉諸寨武陽別出廣漢先驚斜谷方開陳倉徑度殷

肱雖在拊其背而難施首尾空存斷其中而莫救颺輪
捲地聲酣而山鬼皆逃火繳燒雲勢烈而沙蟲俱化三
周不注連逐齊師一出井陘併空趙壁深林搜伏旁批
蟻穴之柯高嶺屯兵徑卓虎牙之帳乙未正月克康薩
爾四月克木思工噶克丫口山河表裏勢旣居高谿谷
崕岬逕尤絕陡過斯以往俯攻卽似建瓴據此而爭死
守亦同奪刃困猶力鬪更憑九折之厓險已難升兼阻
千秋之雪敵先有備伺得隙而後投兵貴乘虛待不虞
而始動梯衝忽合易水晨驚鵝鴨齊鳴蔡州夜襲一則
遲以兩月用三日而畢收一則稽以九旬越一宵而立

潰要津得據武牢竟扼其吭大勢全歸上黨已居其脊
艱難爭險頻年幾度持籌奮迅摧堅茲夕始爲如志然
而遜克宗者懸車束馬我原避險而來穀弩枕戈彼尚
增埤而守小能害大舊聞蜂虿之言後或乘前古有螳
蟬之譬五月旣得噶爾丹寺噶朗噶舍圖枉卡乃遣臣
豐昇額等銜枚卷甲曲厯蛇盤附葛攀藤直探虎穴神
方助順霧迷五里之陰人盡潛蹤花隱百重之影一呼
忽起震屋瓦以羣飛諸道交攻數闔枚而已逼爾弓爾
弩排闥難施我斧我斨鑿垣競入豺狼當道於今忽得
全平魑魅不逢從此無憂竊發七月進攻昆色爾及拉

枯寺喇嘛科爾三寨苗則大海諸處霜濃路滑未怯山
行月黑風高最宜夜戰直摩溝壘爭看突將先登已逼
門庭肯聽蠻奴死拒萬山皆響立殲鉅鹿之沙一炬橫
飛邊烈崑岡之火布金成地唱梵唄而無靈築石爲居
鐵鑾墟而悉掃六丁雷電橫驅者甫屆三朝兩路麾幢
會合者遂臨一水適臣明亮旣破宜喜之後亦廓清日
旁一路五十餘里進攻額爾替石真噶諸寨盡得上下
沙爾尼之地雕旗遙望欣聲勢之相通金柝時聞覺威
棱之益壯成功有日約共繫夫凶渠乘勝過驅遂先圍
其舊砦八月大兵攻勒烏圍五重危磴鐵骨含青一帶

洪河銀濤翻白高墉揭壁共成獸角之形堅壘周環曾
是鴟蹲之地噶喇依遙資屏障儼築重關轉經樓近與
毗連竟成夾寨潰兵歸保逆徒猶自蜂屯大旆臨攻醜
旅依然螳拒於是鉤連長棧先防援應之途絙曳飛杠
預斷逋逃之路平堙坎窞竊同韓信囊沙橫激雷霆未
許劉鄩掘地長圍旣合俄飛走之俱窮孤堞將傾乃騰
凌而並入金戈晃耀三千之控鶴齊呼玉宇高寒十五
之明蟾恰滿四圍礮火中天掣列缺之鞭一片刀光半
夜射望舒之魄堅城旣破直看鼙令浮尸窮寇仍追會
遼陽對簿十一月進克西里科布曲索隆古兜窩又

克朗阿古則朗噶克丫口旋據噶占十二月由瑪爾古
當噶取舍齊雍中兩寺遂直擣噶喇依屢征屢下全成
破竹之形彌八彌深真類剝牀之象迫於頃刻信幕燕
之知危緩以須與尚釜魚之乞活盤瓠之六男六女爰
隨母以歸誠哀牢之十子十妻半挈家而納欵惟茲逆
豎守陴之哭已聞自保孤城銜璧之迎未肯旣而臣明
亮等掃清河西諸處渡河而來後路之兵亦乘勢招撫
咱普庚額特曾達諸寨隨而續至大軍旣會一時燦若
星繁列校爭前四面圍如月暈雲羅萬里周陸而飛鳥
難逃鐵網千絲截水而遊鱗不渡外援已絕薦無可寄

之書內顧無謀颺是已窮之技不降不戰理難聽其苟
延且撫且攻勢將出於生縛乃乘彼亂渴無拜井之泉
爰鼓我師怒躍射彊之矢火珠激迸煙漲成雲金彈碎
笥燄飛掣電戰塵瀕洞聲喧而地軸皆搖殺氣蒼黃力
猛而天梯直上逆酋索諾木求生無計餘息空存欲死
不能驚魂先餒諭之莫省不爲鄭伯牽羊悔亦難追乃
向班超抱馬遂率其兄弟莎羅奔甲爾瓦沃維爾斯丹
巴及兩土婦與大頭人丹巴沃維爾阿木魯綽窩斯甲
尼瑪噶喇克巴偕兩喇嘛擊所屬二千餘人捧印麾前
泥首乞命夙沙自潰窟穴全空盤橐成禽妻孥並繫狂

童右桎不畱梟獍之蹤孽黨反衿未漏鯨鯢之網剝壕
處處業已焚巢貫索纍纍非同獻馘妖星墮地雲開石
紐之山魔雨同晴花暖桃川之樹北上之檻車一發九
姓知威西師之饒吹將還六軍奏凱粵自戊辰以後凡
兩征而邊釁始清聿從辛卯以來經五載而戎機乃戢
蓋事殊擒闢路別中原勢異征淮據非平地削成峭壁
山山皆九渡之河縋出懸崖步步是七盤之嶺隨心取
徑更無蜀棧相連到處藏兵總覺崎師可禦故其地僅
千餘里而往來莫得其途其衆僅三萬人而出沒莫知
其數仰賴我

皇上珠鈴獨握密運兵謀金鏡高懸熟籌地理申明軍律飭司馬之明條整肅戎行選羽林之勁旅發金錢而弗惜民不知勞輓芻粟以常充士皆宿飽

恩威並用人人懷效命之心

指授無遺事事稟先幾之算所以稍稽歲月終得有成備歷崎嶇卒能奏績魚鱉未闢之地列戍開屯葛姜莫到之鄉陳師鞠旅罪人斯得藁街待正明刑荒徼咸寧板屋永霑

渥澤黎風雅雨和甘過大渡河邊羌竹蠻花蔥蔚接無憂城外巴渝舊舞齊隨破陣之歌蜀國新絃總奏平邊

之樂往者天山左右宣威而宛馬東來今茲益部西南
討叛而參狼內向後先一轍總

聖皇獨運之謨上下千年皆舊史未聞之事從此鐃歌
十曲召岐伯以重增定知譯曲三章接唐敢而踵獻域
中慶洽閭外歡騰

臣等仰藉

聲靈幸禽醜逆星郵迅發剋期書到甘泉雲棧飛馳側
想邑名聞喜戢兵轡野彌昭

軒皇教戰之功偃伯靈臺聿瞻

姬室修文之盛

臣

等曷勝踴躍歡忭之至謹奉露布以

聞

擬修定科律詔

乾隆十九年
朝考

朕聞弼教者因以明刑而議獄者不忘緩死奉天出治
每一肅而一溫與時偕行當世輕而世重古帝王刑期
無刑而王道蕩平風俗醇美揆厥所以豈曰無因自文
武澤遙申韓術起嬴秦以降書列法家炎漢以來傳多
酷吏于和召珍仁者傷之隋文平定江南混一天下銳
於求治峻於用刑盜一瓜者抵大辟竊一錢者罹重劓
而上下相遁民氣益偷煬帝以還尤爲操切急同東濕
刻甚吹毛爲民父母其謂之何皇天眷命啓佑朕躬撫
馭神州於今七載瓊室瑤臺之後憐皮骨之空存赤眉

銅馬之餘嗟瘡痍之未復嘗思培其元氣蘇此子遺滌
濫除煩法歸簡約使民不易犯吏不爲奸前令劉文靜
等編纂復令裴寂蕭瑀等參修已釐有成章便可著爲
定憲驅除羸氏事同高祖之入關懲創劉璋勢異孔明
之治蜀布告有位知朕意焉

擬請重親民之官疏

乾隆十九年朝考

臣宗道言臣聞聖人在上其智可以周天下之務其心
可以通天下之情而其勢不能徧天下之人家至戶曉
以爲治相去者遠不相及也古帝王知其然故內有百
揆四岳外有州牧侯伯用以寅亮天工宣布德意雖封

建郡縣其制屢殊而臂指相維事同一致故生民之命
嘗繫於親民之官而居是官者其人乃不可以不擇臣
伏見五季紛爭民生凋敝休養生息莫之或遑我祖宗
誕受天命混一九州厚澤深仁今已三世陛下卽位以
後宵衣旰食百廢具興升中告成於昭萬禩雖唐虞三
代無以加茲也而獨於親民之官若未加意豈以其卑
而忽之耶夫寸轄制輪尺樞轉關權之所在不限大小
封疆大吏所任不爲不重然銜天子之命赫然建節鉞
以臨之百姓視之僅下天子一等耳其勢愈重其體愈
尊而於民間休戚之故愈闊絕而難通故古之循吏下

僚多而大臣少勢使然也知州通判其位卑易控愬也其勢近易察核也其所治狹易周覽也其見民數易相習也其資望輕雖履閭閻問瑣屑而不以爲褻也上達下情下宣上德是亦天下之轄與樞矣陛下輕之毋乃未深計耶且夫吏治易弛而難張官方易淆而難澄一不經心其弊百出方今清公守法約已愛人者守令之中豈日無人然南山之竹不採自直器車之材不規自圓此千百之一二耳其橫者毛鷲搏噬其貪者谿壑不盈其譎者巧詐售欺其懦者昏憤敗事而貴族權門依勢作威者又錯出於其中一二良吏恐不能補千百人

之患也況此一二入者無所激勸亦將隨而波靡哉良由視之太輕核之不力而蠹政害民勢遂至此也陛下兢兢業業日有萬幾誠不能於銓除之時一一親見然臣竊觀周禮之法論辨官材掌之大司馬八柄詔王掌之大家宰源流得失責在大臣請慎簡宰執責以以人事君之道委以進賢退不肖之任於遣任之時以言語觀其才能以容儀觀其德器雖未必周知心術而拔士得五亦足風厲天下磨礪漸久庶乎澄清至於縣令以下雖不當以細事煩大臣亦宜以臺諫等官裁其去取慎之於始與治其敗露之時所得所失相去萬里陛下

儻畱意焉天下幸甚